

寶真齋法書贊

三





贊書法齋眞寶

(三)

撰 珂 岳

王雲五主編
叢書集成初編
海岳名言及其其他二種
三 冊

中華民國二十五年十二月初版

翁

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

寶真齋法書贊卷二十

宋名人真蹟

米元章硯山詩帖

行書八行

山硯雲時抱。齋書客不傳。比牕多異氣。正對淨名天。

右先臣芾大字二詩五幅。

〔案〕硯山詩止一首。與二詩五幅之語不符。當是友仁所跋本二詩。而到但得其一耳。

臣米友仁鑒定。恭跋。行書二行

右寶晉米公硯山詩帖。真蹟一卷。硯山者。公平平生所寶也。老謀菟裘。遂以易海嶽之居。予固言之矣。治餉京口。既得舊址。免葵燕麥。動懷人之歎。因築園建祠以奉公。一日觴客鵬雲樓上。客鄭君猷視園之扁。謂笈中嘗藏公硯山詩。取而視之。良是贖以得之。蓋紹定戊子之四月。因刻以殿英光之帖。贊曰。壺嶺九華。營是一枝。何異乎持琬琰以易羊皮。硯之不存。而寶此詩。抑類乎舍魚兔而守筌蹄。不我後先。得于斯時。几席江山。庶幾見之。

米元章甘露詩帖

行書二十行

欲雨氣不透。庭梧有栖煙。迴首望北固。雲藏淨名天。呼童速具輿。凭高攬山川。隱見豈不好。開霽景固全。須臾剛風流。漓漓清露圓。歸塗知有伴。華月上丹淵。○甘露作。吳夷曠。

右寶晉米公甘露詩帖。真蹟一卷。甘露之勝偉矣。公詩奇筆勁。亦復稱之。予皆未暇論。獨詳味呼輿及歸塗作伴之語。公之居必在山之趾。殆是海嶽未火時。他日既東。當不復能覓夕往來矣。山有鳳凰池。

丹淵蓋指此。予于是益信予之記跋。皆粗有依據。紹定戊子四月。得之蘇臺王氏。紙素少暗。故滿滿如碧雲色。有藏書家印四。字畫尤飄勁于平時。實今世奇帖。

贊曰。公嘗有淨名之詩曰。殷勤顧景物。爲爾老南徐。攷乎此篇。則出無晴雨之待。觀無陰霽之殊。晝呼竹輿。暮詠歸塗。既不舍于斯須。其必邇于海嶽之故廬。如曰。易硯山之寶儲。登樓平章。維王及蘇。自西徂東。乃獲奠居。此所謂舍其舊而新是圖。予固因以驗予記與跋之皆不誣也。

米元章寶月觀詩帖

行書十
一行

新創亭觀之盛。又非海岱比也。寶月觀用觀風樓基。高出雲表。詩曰。濁盡塵難掩。光分逐露圓。香清得桂子。珠瑩墜花鈿。求一篇見海月處也。

右寶晉米公寶月觀詩帖。真蹟一卷。海岱在漣漪。是蓋公宰邑時所作者。本雜書簡帖中。亦摘取而別之。繫以贊云。

贊曰。月之行空。四海清輝。豈獨于一觀見之。覽層宇之聳。地高而天隨。而後可以觀公之詩。

米元章鑑遠前詩帖

行書二
十一

夜登鑑遠觀江南野燒作

君不見紅旗一卷無奔北。龍驤將軍初下蜀。又不見天兵十萬領潘曹。百丈靈旗照江國。高樓夜登有健賞。江南野燒深山谷。烈勢已覺逼南辰。龍蛇血膏如爆竹。故應玉石俱被焚。老樵拾炭投斧斤。長松巨梓中大廈。一隨烈焰同埃塵。人言木自爲風戛。木中生火自焚爇。欲知利害日相磨。此火害人尤躁熱。○帝

上呈。

右寶晉米公鑑遠前詩帖。真蹟一卷。帖有四印。出貴臣家。嘉定戊辰。官鬻于鄺肆。德清李氏得之。予又贖之。李氏其筆法蓋老作云。

贊曰。登覽之勝。隨寓有感。野燒之觀。玉石俱慘。逞志一快。忘彼物情。是以老氏惡夫佳兵。觀乎觀乎。彼以爲觀。而予以爲懲。

米元章鑑遠後詩帖。行書十行。

鷗鷺寒依水。蒹葭靜靡風。朝煙開雨細。輕素淡山重。

鑑遠樓米老。【案】是詩。已見前四大字詩帖中。題云過富塗。與寶晉英光集所載合。今復出于此。而後書云。鑑遠樓米老。疑是詩才係過富塗所作。而復于鑑遠樓書之。珂遂以爲鑑遠後詩云。

右寶晉米公鑑遠後詩帖。真蹟一卷。紹定戊子歲二月。得之平江莫氏。莫蓋寶晉家戚舊云。贊曰。野燒之觀。予嘗以爲歎。此詩之序。予又以爲欣。一鑑遠耳。而戚休之以身。天乎非人。

米元章卽事詩話。行書十行。

不應武康清溪之檄。端居卽事。呈淮陽建昌二太守。辰溪監郡三公。芾上。

祕篋大開千古到。雪圖小挂滿堂寒。墨濃員嶠峯孤起。枕冷燕山玉一團。圓扇古人蜂雀意。清風四海弟兄歡。閉關不謝勤來客。畏暑非緣懶作官。鳬脰欲長寧可益。蜩枝求足已能胖。有時驚覺神漢夢。北里新聲舞翠鸞。

右寶晉米公卽事詩帖。真蹟一卷。按書史。公游相國得雪圖。爲富韓公之壻范大圭持去。其記甚詳。今

此所挂豈別一王維耶。且畏暑不應檄。自開祕笈而勤來之客不拒。想皆樞言康功志東。輦耳。又不知二太守一監郡。果何如人也。帖本與諸小帖同得。別而出之。

贊曰。平時不可告以情之客。自不得以窺祕笈。而況乎畏暑與閉關。三公得此詩。固必能進退如理。據空案以觀者也。旁無梅子平。又烏知垂涎于滿堂之寒。塞馬得失。海漚往還。當不足以隔四海兄弟之歡。畫史之浪傳。予意其當據此詩以刪之也。

米元章催租詩帖

行書八

一司日日下賑濟。一司旦旦催租稅。單狀請出。且抄納。郿邑以身當夏稅之責。不令受賑時催。

百姓眼中聊一視。白頭縣令

受薄祿。不敢鞭笞怒上帝。救民無術告朝廷。監廟東歸早相乞。○芾呈。

右寶晉米公催租詩帖真蹟一卷。詩亦在羣帖中摘出。歲月不可攷。意當在公爲漣水。雍丘時。贊曰。賑濟者何人。催租者何司。有令如斯。而無救于背馳。此古人所以設官以採詩也。

米元章槐前竹後詩帖

行書五

槐前竹後午陰繁。壺嶺華胥屢往還。雅興欲爲十客具。人和端使一身閒。

古洲居士曾觀。

草書一

元章字畫。脫盡筆墨畦逕。無一點塵俗氣。是可寶玩。槩敬書。

行書三

右寶晉米公槐前竹後詩帖真蹟一卷。有楚冑印一。紹定戊子。予在京口得之。亦藝將張松冢物也。硯山槐竹似矣。餉事日殷。安得身閒如公之賦詩乎。予于是有感焉。

贊曰。槐竹之與居。栩栩乎華胥。予方發韓滉之連牘。午陰之繁。維以驅原隰之車。蓋健羨乎一身之閒。所以縱玩乎八體之書。

米元章萬籟詩帖行書八

萬籟寒深響。羣山隱映開。遲遲暮鐘裏。且喚竹輿來。

右寶晉米公萬籟詩帖真蹟一卷。按此亦甘露作也。寒夜鳴鐘。猶不廢登覽。江上風月。公胸中固有之矣。帖與甘露詩同得。亦有藏書家印四。

贊曰。甘露之江山。世固指爲天下之第一矣。而況公胸中。自有烟霞之痼疾耶。予嘗持斯帖。據狼石。望淮海。弔今昔。慨然歎曰。神州沈陸。固當待一代之英雄。名勝風流。亦必屬百年之翰墨也。

米元章壯觀前詩帖行書二十五行

無涯小智日營營。昔昔浮生夢數驚。重到白沙登壯觀。江湖醉眼暫揩明。夢寐中間得鹿時。孔軻如在定能知。江山勝處頻傾酒。我是當年謝客兒。

右寶晉米公壯觀前詩帖真蹟一卷。有內殿圖書五。紹興小璽一。其子友仁鑒定于後。按山林集。嘗有是賦。泱泱乎塊辭雄談。前無卿雲。殆與是詩相爲表裏。信哉山川清奇。樽俎名勝。要非齷齪塵埃者。所可與議也。嘉定甲戌十一月。予在中都。得之麝鬚者。贊曰。北山之麓。有奇觀。景絕人奇。乃無間。賦非雕蟲句有眼。千古雄姿想蕭散。我觀此卷字老曠。猶似古彙觀數額。借公舊詩聊永歎。跪閱墨皇三復返。

米元章壯觀後帖行書十一行

同二公遊壯觀上呈府公工部芾

壯觀不到俄四朞。丁寧老思模雄奇。羣山勢活各奔走。大川氣斂合衆離。蒼嵌留雪玉刻巧。碧落靜滑紅輪馳。寒潮不生九澤凍。行膠與子約再來。

右寶晉米公壯觀後詩帖真蹟一卷。亦在舊帖中。公于壯觀拳拳如此。胸次可知也。

贊曰。四朞之不到。雪餘日杲。停舟不棹。無嫌乎衝冒。出此詩畫。摹寫天巧。觀之壯思之老。詩乎可攷。

米元章姑執詩帖行書二十行

下輿照澗數星。一世還如隔世經。不見山東李十二。青山山色只青青。

過姑執作海嶽米老

右姑執詩大字。先臣芾真蹟。臣米友仁鑒定。恭跋。

右寶晉米公姑執詩帖真蹟一卷。短軸大字。筆老意真。有其子友仁跋。凡璽印十有七。歷歷咸具。詩蓋爲宮錦謫仙而作。千載相望。可以紹遺躅矣。寶慶乙酉四月。予得之京師。鄭鬻者。開卷歎息。因廣其詩以爲之贊。

贊曰。天上一文章。一酒星。生平只欠換鵝經。奇才逸思通千古。留待南宮眼爲青。

米元章道林詩帖行書十一行

陟嶽不自期。孤雲掛松頂。一揖不相期。飛去無留影。雲已去。泉更長。雲泉畢世友。相得每相忘。

漣漪瑞墨堂書

先子道林小詩一首。友仁鑒定真蹟。行書二謹跋。

米元章字畫類能用其所長。往往不擇紙筆。皆得如意。至于險怪脫略。雖其病處。亦自成妍者也。慶元戊

午秋八月。周蒙題。行書四行。

右寶晉米公道林詩帖真蹟一卷。有其子友仁鑒定。他蹟皆著臣名。惟此則否。蓋士夫家所藏。而取正于友仁者也。予開禧丙寅。以南徐庾吏。被檄犒師。宿泗至于漣漪。荒壘頽垣中。有十數立石。皆靈壁奇甚。狐榛兔葵。蕪穢埋沒。或指謂予曰。此瑞墨堂故基。後二十三年。而得此帖于京口。道林在三湘間。豈漣漪別有其名耶。極目莽蒼。又豈雲泉松陰。隨時變遷耶。不然。則友仁之鑒定。或在他帖。而此詩非道林之真耶。按山林集。詩無名。特繫之瑞墨堂。是拾遺者。亦不得而攷耶。贊之以傳疑焉。

贊曰。道林之名。予不得而知。雲泉松石之勝。寫于漣漪。必其地之景物。足以稱其詩也。今其陳跡杳然。已無復遺。予蓋嘗登瑞墨之基。渺一境之陂陀。皆平蕪與荒畦。又惡覩所謂畢世相忘之奇。泉墜雲歸。松橋斧隨。世固多有之。而予獨于此。奇其北向之悲也。

米元章賞心詩帖。行書十行。尾記二行。共二十字。〔案〕二十字。原注云。行。恐有誤。尾記二行。亦脫去。今並仍原本。

晴新山色黛。風縱蘆花雪。盡日倚雕欄。寒宵低細月。

右寶晉米公賞心詩帖真蹟一卷。嘉定己卯。予漕江東。屢登賞心。訪臥雪之圖。問坡仙之跡。獨未知有是也。後八年二月。于京口得之。以三萬錢。予欣然。蓋自慶未始得聞也。意如寶晉者。豈知百餘年後。爲

人作三萬錢地耶。

贊曰。金陵之賞心。天下之奇觀。真足以當南宮之詩翰。予之持節登覽。非一旦而得此詩八年之泮矣。吁。嗟公兮。豈料百年而售此詩于三萬兮。

米元章壽時宰詞帖行書二

祝壽慶生申。德日維新。期頤眉壽。壽長春。五福三靈。祿永永。長壽仙人。遐算等莊椿。德康寧。年年懽會笑欣欣。歲歲仰依壽域。彭祖廣成。○祝壽浪淘沙。芾上獻。

先子真蹟也。昔唐李義府出門下典儀。宰相屢薦之。太宗召試講武殿。側坐而殿。賜有烏數枚。集之上。令作詩詠之。先子因暇日偶寫。今不見四十年矣。易安居士求跋。謹以書之。敷文閣直學士。右朝議大夫。提舉佑神觀。友仁謹跋。行書九

右寶晉米公壽詩帖。真蹟一卷。詞不知上于何歲月。山林集有呂汲公生日詩。豈同時耶。嘉定辛巳二月。得之建康。元暉跋本他卷物。以同得。故併標之。

贊曰。太平得協于夢卜。濃墨大軸。予未知其誰祝。韓呂之穀。王蔡之辱。尙四海之欲。

米元章墓誌帖行書一百

宋朝散郎。飛騎尉。賜緋魚袋。陳君墓誌銘。序有

右銀青光祿大夫。守尙書右僕射。兼中書侍郎。上柱國。魯郡開國公。曾布撰。奉議郎。充江淮荆浙等路制置發運司。管勾文字。武騎尉。賜緋魚袋。米芾書。龍圖閣學士。朝請大夫。知揚州軍州事。兼管內勸農使。上

護軍曲阜縣開國子。賜紫金魚袋。曾肇篆蓋。

治平中。余爲海州懷仁令。而永康陳君實佐余爲主簿。余與君皆少且壯。相得甚適。後六年。余以翰林學士判司農寺。薦君爲勾當公事。余論事貶番禺。君亦以憂去。又二十年。余在政府。而君復官守京師。又七年。君以疾卒。明年其子次中。縗服自浙東來。再拜且哭。願得銘也。余與君游四十年。而又以仲兄之孫。妻次中。銘詎可辭。君諱愷。字濟公。婺州之永康人。曾祖思遠。祖文授。父億。皆不仕。父以君貴。贈朝奉郎。君力學有大志。少以文采知名。朝奉君與大父相繼卒。君未及冠。家故貧無貲。喪祭冠婚。悉倚君以辦。其餘力已能嫁兄弟之女。未嫁者。登治平四年進士第。初仕蓋懷仁也。徙光州軍事推官。知廬州合肥縣丞事。熙寧中。神考肇新百度。弛徭役以寬民力。修水土以敦本業。更常平斂散之法。以恤貧弱。凡經畫民事。一委之司農。故司農最號要地。爲從事者。實一時高選。然經始之際。四方以利害言。無虛日。君從容研究。纖悉通解。時以爲稱職。遷著作佐郎。且命按察淮西農田保甲等事。召對便殿。復使淮浙兩路。歲大旱。民轉徙于道。君移文郡縣賑恤之。婺爲甚。飢殍枕藉。君欲發常平之粟。以紓其急。部使者噤不肯從。君顧而言曰。吾銜命使一方。民疾苦若是。儻不能盡力于斯。實辱君命。且吾職在廉察。爾終能與我違戾耶。責固在我。爾安無恐。乃大開倉廩。民賴以活。部使者由是銜之。君之出使。里人有擊鮮醢酒以勞之者。而使者在所部。乃以君爲墨。而置之獄。有司傳致。卒坐法免。議者以君爲冤。哲宗踐阼。以恩復宣德郎。監福州海口鎮鹽稅。徙光祿寺丞。分司南京。已而朝廷知其非辜。悉除其罪。以選爲郎國忠正。武昌軍三院大小學教授。秩滿。除通判熙州。未行。改管勾步軍司差撥剩員所。今天子嗣位。賜五品服。累遷至朝散郎。飛騎尉。元

符三年七月屬疾。謂其子曰：「吾且死，亟告老以歸。」乃屏醫藥，不復詢家事。旬日而卒。實癸巳日也。享年六十有六。以崇寧元年三月十七日壬申葬于龍山之北原。娶錢氏，封金華縣君。子男五人，長曰次牧，太廟齋郎。次曰次公，次曰次中，擢進士第，爲峽州安遠縣尉。次曰次仲，次道與次公舉進士。女三人，長適鄉貢進士袁輪，次適鄉貢進士李光祖，次適鄉貢進士許操。孫男二人，女一人。君詞學爽邁，少以氣自豪，而又敏于從政。所至輒治辦，熙寧首被選，擢人實期以通顯，然一遭橫逆，誣服受詬，坐廢幾二十年。困躓有如是者。余自州縣吏與君相好，逮余執政，君已垂老而不用于世。方將從容薦于上，而君不幸死矣。豈命也夫？銘曰：仕困于仇而不克顯，才屈于命而不克施。有子而立嗣，厥世君則不朽。刊吾詩。

右陳朝散墓誌。丞相魯公撰。先子晚年真蹟。紹興丙寅仲夏二十八日獲觀。友仁鑒定。謹書。

行書四

右寶晉米公書曾文肅陳濟翁墓誌帖真蹟一卷。諛墓之文，豐碑碩碣，相望于牆間，而世率不之錄者，書也。紹定戊子二月得之雪川李氏。

贊曰：予觀柳少師在唐以能書聞，當時碑誌或非其筆，則人以不孝議其子孫。噫，噉陳君之傳，夫豈以文如寶晉者亦庶幾乎其人矣。

米元章書山谷大悲懺贊帖

行書六行
尾批四行

通身是眼，不見自己，欲見自己，頻撒驢耳。通身是手，不解著鞭，墨牛懶惰，空打車轅。通身是佛，頂戴彌陀，頭上安頭，笑殺涪皤。

魯直題徐文信大悲懺贊，見其人，誦其語，真脫塵埃耳。芾、元章。

右寶晉米公書黃山谷大悲懺贊帖。真蹟一卷。公與山谷同時。而景慕之如此。異時求薦之帖。曰襄陽米某。文在蘇軾黃庭堅之間。其竊比之心。亦可見已。如是懺者。以勝妙相接引。衆生居閻浮提。幻非幻質。贊語透徹。三昧流出。見性成佛。直指人心。所謂畫者贊者。皆得成就。第一希有功德。于此時。乃能取三生八體結習。爲一大緣事。作摩訶薩埵觀。引筆行墨。正念現前。等是二者。無有差別。又所謂不于一佛二佛。而種善根。乃至百千萬億佛。種諸善根者。見聞歡喜。得未曾有。此歲在丁丑。室伐拏。月從越。氏。我乃受持。復宣此因。說偈讚歎。又所謂受者藏者。讚悅者。皆植福本于□世。與佛有緣。神通光明。具足圓滿。于□寶真。是足以爲寶矣。

贊曰。我佛住世。大開方便。有大士者。現自在身。以千手眼。一一接引。指示羣迷。照破諸妄。如是我聞。佛說了義。諸鈴杵鐸。寶塔經卷。輪拂瓔珞。種種所執。凡所執者。俱非有相。智慧清淨。肉眼慧眼。佛法天眼。種種所見。凡所見者。俱非有著。以無相故。釋諸纏縛。一切衆生。得大解脫。以無著故。具足圓明。一切衆生。得大知見。佛尙無相。何況于讚。佛身常住。卽心是佛。稻麻竹葦。無限劑數。彼頂戴者。皆真實相。百千萬億。何況于身。涪幡說法。如標月指。標本在手。何者爲月。寶晉寫讚。如轉輪王。運轉隨人。終不成道。我不見懺。我不執筆。非見非執。手眼皆具。稽首大士。大慈悲故。去我妄想。卽見如來。

米元章臨晉武帝大水帖

草書四行
尾記一行

去歲大水。城中大飢。撫別君便常分南諸軍耳。此奈卒無所復。箭已送。
右晉武帝書。李太師瑋本。

右晉武帝大水帖。先臣芾手臨真蹟。臣米友仁鑒定。恭跋。行二

右寶晉米公手摹晉武帝大水帖真蹟一卷。寶晉平生自言法書斷自西晉。其作書史載李瑋家所得晉賢十四帖中有臣詹晉武帝批答一。豈此耶。臣詹不知何人不足摹。故止及武帝書耳。按今中祕羣玉堂帖芾真蹟有云好事家所收帖有若篆籀者。回視二王頓有塵意。晉武帝帖是也。謝奕之流混然天成。謝安清邁真宜批子敬尾也。其帖首尾印多與弊笥所收同。君倩唐氏陳氏之類印。玉軸古錦皆故物。希世之珍不可盡言。恨不能同賞歸。卽追寫數十幅。頓失故步可笑可笑。觀此芾之留意蓋可見。西晉字在今豈可復得。得見芾之摹斯可矣。其子友仁嘗著鑒定。縫有內祕書印。紹興印二。宸奎標目。嘉定甲申十月客或得之宗藩以歸于我。

贊曰。論帖至晉書法之祖。溯晉而西。又舉一武。樸散質寓。意妍態魯。禁樹之藏。尙覲真古。

米元章臨謝安八月帖。行書七

米芾臨謝安八月五日帖。仙書題

八月五日告淵朗廓攸靖玄允等何圖酷禍暴集中郎奄至逝沒哀痛崩慟五情破裂不自堪忍痛當奈何當復奈何汝等哀慕斷絕號咷深至豈可爲心奈何奈何安疏。

右謝安八月五日帖先臣芾手臨紹興九年四月二十七日臣米友仁審定恭跋。行三

右寶晉米公手臨晉太傅謝安字安石八月帖真蹟一卷按帖本在淳化閣帖中東淮餉府供軍堂所刻破羌帖之次亦有此臨帖本出天上有紹興三璽并宸翰標目亦其子審定而帖中情字作內字又

中間少十二字。末少奈何二字。蓋臨帖縱筆隨意所爲者。不若此本。則與閣帖皆同也。友仁謂芾平生蓄晉帖。日臨學不計數。夜則以小笈置枕旁。攷之寶晉山林集。所贊所藏。芾嘗自指。此爲絕品。宜其臨本之多也。帖尾友仁跋字。與前跋亦較歲月。又不知中興後所流傳者有幾。而吳氏之傳。與予之得。膺合如一。是又重可貴也。寶慶乙酉二月。得之故宗臣家。

贊曰。八月一帖。無爲寶晉之刻。則其初也。兵燬而後重取而鑄。遺其精而得其粗也。京口供軍之碑。紹興所傳。芾之書也。此帖亦其同時。同出于尙方之儲也。芾之嗜帖。所謂麻紙十萬。足以驗其平生之工夫也。字與跋皆不同。蓋所臨雖出一手。而其所得之時日則殊也。供軍帖字之所以寡。出于率意之真。而此二帖。則皆臨而非摹也。京口海嶽。芾所居也。兩臨本之並傳。尙可以見其人之緒餘也。

米元章臨智永千文真草帖

十二行·天地玄黃·至柔重芥薑·海眞草間列尾記二行·文不錄·

崇寧兩學書贈亦虛

右智永書真草千字文真蹟。先臣芾手臨。臣米友仁鑒定。恭跋行二。

右寶晉米公手臨陳僧智永千文二卷。摹臨兩法本不同。摹帖如梓人作室。梁欂桷。雖具準繩。而締創既成。氣象自有工拙。臨帖如雙鵝並翔于九霄。青天浮雲。浩蕩萬里。各隨所至而息。寶晉蓋進乎此者也。神動天隨。筆與心會。似不似未可期。而真態韻頗已與千載相上下矣。帖有小璽藏肝江廖氏慶元丁巳。予歸自閩。九月相遇皇華館。廖方以此軸投郡守丘琛。予輟而取之。贊曰。永之法。妍以婉。芾之體。峭以健。馬牛其風。神合志通。彼妍我峭。惟神克肖。故曰袒褐不浼。夜戶不

啓善學柳下惠莫如魯男子芾其知此。

米元章臨右軍四帖草書·第一帖七行·第二帖三行·第三帖二行·第四帖六行·

米芾臨王羲之初月十二日等帖御書題籤·

初月十二日羲之累書至也得去月二十六日書爲慰以可不下違之不無所一欲噉不化消諸弊日甚不知何以教之罔然及不王羲之頓首

官舍佳也節風故不適可憂彼云何昨得熙書殊佳甚慰甚慰

得官奴晉陵書平安念懸懸此組佳一日書以□□見尙書一日遣信以具必宜有行都情事恐不可委行使耶遲遠具問近以之尙書懷今後遣吳興也

羲之真蹟四帖麻紙上書先臣芾舊所藏其二得于職方員外郎劉涇其二得于大相國寺僧清道偶合縫有唐室貞觀小璽文大觀間已獻御府迨元祐之末先臣芾權潤州州學教授時紹聖間任樞密院事林希以待制爲潤守極好古博雅出此帖示之希曰昨祕閣所見貞觀印文貞字在上觀字在下相去五六寸許遂熟視之所印上下各不相對希歎曰益顯此書是真唐御府所藏蓋或有時上下印也先臣芾所藏晉唐真蹟無日不展于几上手不釋筆臨學之夜必收于小篋置枕邊乃眠好之之篤至于如此實一世好學所共知此帖乃先臣芾中年手臨今得祕于紹興嗣聖天府實萬世不朽之傳翰墨之學出類拔萃必有神物獲持亦可謂榮遇矣今臣忽得經目一閱恭跋于後臣又繼膺宸翰所臨以賜伏覩筆意快逸意在筆先字字縱心皆相連屬龍鸞飛翔眩映觀觀深得羲之法度妙處非愚臣所敢率易窺頌得